





ORATIO

IN FUNERE

FERDINANDI VI.

HISPANIARUM REGIS CATHOLICI

IN SACELLO QUIRINALI HABITA

III. IDUS SEPTEMBRIS

CORAM

CLEMENTE XIII.

PONT. OPT. MAX.

A LEONARDO ANTONELLO

EJUSDEM SS. D. N. PRÆLATO DOMEST., S. CONGREG. CONSIST.,
S. COLLEGII, ET ARCAN. EPISTOLARUM SECRET.



ROMÆ MDCCLIX.

EXCUDERANT BENEDICTUS FRANZESI, ET CAJETANUS PAPERI
SUPERIORUM PERMISSU.

OKLAHOMA

THE TERRITORY

AND THE STATE OF OKLAHOMA

IN THE DISTRICT OF COLUMBIA

IN THE DISTRICT OF COLUMBIA

IN THE DISTRICT OF COLUMBIA

IN THE DISTRICT OF COLUMBIA

IN THE DISTRICT OF COLUMBIA

IN THE DISTRICT OF COLUMBIA

IN THE DISTRICT OF COLUMBIA

IN THE DISTRICT OF COLUMBIA



IN THE DISTRICT OF COLUMBIA

IN THE DISTRICT OF COLUMBIA

CLEMENTI XIII.

PONT. MAX.

LEONARDUS ANTONELLUS.



*UI aliquid a sese scriptum,
BEATISSIME PATER, edunt in
lucem, ac Principibus viris inscribunt, solent ple-
rumque torqueri non mediocriter, ut idoneam,
aut certe probabilem aliquam consilii sui causam*
A 2 *præ-*

præterdant, nec tamen interdum quidquam afferre, quamobrem id quod faciunt, non ambitione progressi, sed officio aliquo adducti facere videantur. Hoc ego mihi, Orationem hanc in funere FERDINANDI REGIS habitam, in lucem edenti, tuoque nomini inscribenti ne accidat, minime verendum esse arbitror. Edo in lucem, non quod luce admodum dignam esse judicem, sed quod ita fieri necesse sit more institutoque Majorum. TIBI autem inscribo, quod eam intelligo multis nominibus ad te pertinere, ac plane tibi debitam, ac tuam esse. Tuo illa in Sacello, coram Te potissime est habita: Tu me unum ex omnibus delegisti, cujus voce Regi optimo ac clarissimo illud pietatis officium solveretur: Tu me trepidantem, meique ingenii tenuitatem excusantem, loci illius, quem nunquam ante attigeram, auctoritatem pertimescentem, pro tua humanitate erexisti, & confirmasti: Tu pro tua sapientia mihi etiam in quibus potissimum versaretur Oratio indicasti, ac demonstrasti Orator, qui in Pontificio Sacello, de CATHOLICO REGE verba faceret, quid potissimum spectare, ac sequi deberet; ea videlicet, quæ sanctitati loci, Pontificiæ dignitati, sacrorum Mysteriorum amplitudini, atque præstantiæ maxime conuenirent, quibus non qualiscunque, sed supra ceterorum hominum conditionem positi, & ad Christianæ virtutis normam conformati, perfectique

Re-

Regis laus contineatur, dici ac prædicari oportere; sanctos mores, vitæ modestiam, justitiam, liberalitatem in populos, Religionis studium, erga homines charitatem, eximiam in Deum pietatem, ac venerationem. Hanc ego optimi Principis formam, quam hic dicendo, quantum potui, adumbrare conatus sum, alteri potius darem, quam tibi redderem, a quo acceperam? Quid, quod ad has causas, quas dixi tam multas, accessit quædam etiam mirifica temporis opportunitas? Nam per eosdem fere dies, quibus a me scripta, atque habita est Oratio, Tu Patrum meum, Tu me ipsum summis, atque immortalibus tuis beneficiis cumulavisti; quod illum in S.R.E. Cardinalium numerum cooptasti, me Tibi ab Arcanis Epistolis esse voluisti. Cui tantæ in me benignitati, ac clementiæ, quoniam in tam dispari gradu ac conditione parem gratiam referre non possum, meque sentio victum, atque oppressum beneficii magnitudine, certe hoc, quod possum, & habebo tantam gratiam, quantam maximam meus animus capere potest, & vero mihi e manibus elabi non sinam, aut hanc, quæ obtulit se tam opportune, aut ullam aliam, quæ aliquando se offerat, occasionem, grati ac memoris, Tibique omnia se habere intelligentis animi, testificandi. Ac præterea (quam puto esse optimam tuendi beneficii, ac referendæ gratiæ rationem) dabo operam, ut quantum Tu

mibi, eo munere mandando, honestatis ac ornamenti accedere voluisti, tantum ego mibi oneris impositum esse judicem; ut omne meum studium, officium, operam, laborem, diligentiam ad tuam gloriam, & laudem, quoad finit mearum virium imbecillitas, conferam, atque ad Sedis Apostolicæ decus, & incrementum. Habeas igitur, CLEMENS Optime, ac Sanctissime, ab homine nihil Tibi non debente perpetuæ in te voluntatis, atque observantiæ testimonium, quasque pignus, hanc Orationem FERDINANDI VI. virtutes continentem, quas Tu quidem exprimis vita, multo melius, quam aut ego, aut quisquam alius Oratione. Etenim quæ duæ res in Principe maxime desiderantur, altera, ut nihil reprehensione dignum committat, altera, ut magna agat, cogitet etiam majora, eas profecto in Te excellere, omnium consensus est, sed eorum præsertim qui tuos sanctissimos mores propius admirantur, tuoque imperio subsunt, & potestati. Sed me tuarum virtutum, quæ latissime patent, quasi vastissimum campum ingredi cupientem, absterret, ac retrahit tua ista in tot virtutibus maxime admirabilis modestia, qua fit, ut in tanta copia rerum laudatissimarum, laudari nolis. Unum restat, ut mibi tuos osculanti pedes, & benevolentiam serves, & Benedictionem largiaris.

ORA-



ORATIO.



I quanta est eorum , qui excedunt
e vita virtus , atque amplitudo , tan-
tus in nobis, qui vivimus, ex eorum de-
siderio susceptus dolor , & mœror esse
deberet , nihil profecto inter hæc iusta
funerum , quæ FERDINANDO VI. Hispa-
niarum Regi solvuntur , Te BEATISSI-
ME PATER , atque isto , qui te circum-
stat , frequentissimo , gravissimoque Se-
nату mœstius , & conturbatius , nihil

oratione mea dolentius , ac luctuosius esse oporteret . Cujus enim
virtus eximia fuerit , ac prope singularis , eum eximio ac singu-
lari quodam lugendi lamentandique genere flere par esset . Ve-
rum aliter , longe aliter se res habet . Faceſſant enim Vulgi opi-
niones , ratio audiatur ac veritas , quam æquum est ſolam in hac
Sede Religionis , atque inter hæc Sanctiſſima Fidei noſtræ Myſteria
dominari ; jam ab omnibus intelligetur hujus Regis , de quo lo-
quor , magnitudo atque præſtantia non ad augendum , atque exag-
gerandum , ſed potius ad extenuandum minuendumque dolorem
pertinere . Non enim , quod interdum accidit illis , qui magni in-
ter homines ac beati eſſe putantur , iis laudibus maxime præſti-
ſtitit FERDINANDUS , quarum curſus morte abrumpitur , ac fulgor

nescit ; sed veris , sed solidis , sed iis quæ morte adimi non possunt ; modestia , integritate , mansuetudine , studio Catholicæ Religionis , eximia in Deum atque in homines caritate . Harum ille virtutum memoriam ac multas etiam in multos mortales utilitates inde profectas hic reliquit , magnam vim ac fegetem meritorum secum asportavit in Cœlum , in patriam , in jucundissimas atque omnium bonorum plenissimas Sedes Beatorum : quo eum confidimus aut jam venisse , aut , si quid forte adhuc hæret humanæ labis , ubique persolutis ab Ecclesia Sacris ac precibus propediem esse venturum . Absit igitur ab hac Regis optimi suæque decora etiam post mortem retinentis laudatione omnis vox fracta , mollis , dolore debilitata ; lacrimæ , gemitus , querelæ removeantur . Fuerit Ethnicorum illa consuetudo qui nenias , cantiones , præficas vita functis prodesse existimabant : Nos certe , quibus persuasum est non habitandi locum , sed commorandi diversorium hic nobis esse concessum , ex quo cum migramus ex hospitio miseriarum plenissimo ad Superos evolamus , non eodem decet occupari luctu , quo cœteros , qui spem non habent . Sed pro , eo , cui hæc pietatis officia tribuuntur religioso cantu ac pia mente Deum obsecrare ; tum , si quæ interim oratio habenda sit , ea dicere quæ argumento esse possint , illi , cum hinc abiit , non interitum , sed requiem , non mortem , sed quendam suavissimum somnum , & ad cælestem patriam migrationem , commutationemque vitæ contigisse . Quod quoniam sola virtutum commemoratio præstare atque efficere potest , age jam FERDINANDI vita quam laudabiliter traducta , quam plena officii , quam Catholico Rege digna fuerit videamus .

Ac mihi quidem in magna copia rerum dicendarum , magnisque temporis angustiis intelligo necessario esse festinandum , multasque res dignissimas quæ dicantur , aut silentio prætereundas , aut oratione attingendas potius , quam pertractandas . Quamobrem puerilis FERDINANDI educatio cujusmodi fuerit , non commemorabo . Scitis Hispanorum Regum pueri quam accurate instituantur , quam pie , quam sancte , quam severe ; ut mirum non sit eos ex optima disciplina prodire sane optimos , singulari vitæ integritate , sensu pietatis , ac studio item Religionis singulari . Quarum quidem laudum in FERDINANDO jam tum in puerili ætatula florem , atque
ipsum

ipsam prope fructuum maturitatem apparuisse non miror. Magna quippe habebat incitamenta, nec magis Præceptorum vocibus, quam Majorum suorum exemplis, paterna virtute, Regio splendore ad decus excitabatur, ut laudabiliter vitam traduceret, ut ad virtutem mores suos componeret, ut animum ad sapientiam conformaret. Illud potius mirandum, & commemorandum esse puto, adolescentem in Regia domo, quasi in edito quodam excelsoque loco positum, indeque omnia infra se intuentem; tam multa quotidie de Borboniæ gentis gloria, potentia, celebritate, tam multa de Philippi patris sui auctoritate, felicitate, opibus audientem, fuisse animo tam moderato, tam modesto, tam alieno ab omni honorum atque Imperii cupiditate, ut, facta potestate regnandi, privata conditionis obscuritatem, Regiæ fortunæ splendori anteponendam judicaret. Cui enim est ignotum Ludovico ipsius Fratre, in quem Philippus transtulerat omne regnandi jus a sese abdicatum, acerba morte sublato, Regni hæredem fuisse FERDINANDUM, eundemque cum matura jam ætate, omnium expectatione, fraterno exemplo, Patris denique voluntate, atque hortatibus ad capeffenda imperii gubernacula invitaretur, constantissime recusavisse?

Fuit profecto, fuit illa inusitata quædam, & singularis contentio, fuit certamen pulcherrimum, hominibus admirabile, Deo gratum, dignum pietate Regum Catholicorum. Cum ex altera parte Philippus tantis periculis superatis, ac laboribus exanthlatis in summa rerum humanarum vicissitudine, fluxa hæc & caduca, quæ imperita multitudo appellat bona, ultro contemnens, Deoque uni vacare, ac beato solitudinis otio frui cupiens, ægerime ferret, se a portu abstractum in Regni scopulos, atque in illas tot negotiorum moles, quasque salebras incidisse; cum præclaras illas plenasque modestiæ, ac sapientiæ voces sæpe iteraret; privatum se velle vivere, Regno valedicere, omnium rerum curam, atque administrationem permittere Filio, quem multis jam rebus spectata virtus, & diu cognita, tanto muneri sustinendo parem esse declaraverat: cum hæc inquam, Philippus sentiret ac loqueretur; ex altera vero parte FERDINANDUS, tanto se oneri ferendo minus idoneum esse diceret, nullam cessionis, atque abdicationis mentionem fieri pateretur, una in re Filius optimus a Pa-

tre sapientissimo dissentiret . Quo in certamine major ne fuerit Philippi virtus in Regno abdicando ; an FERDINANDI in recusando , anceps erit iudicium , nec parva contentio apud eos etiam , qui nascuntur . Mihi quidem una in re non una hujus , quem laudo , virtus interfuisse videtur , sed multæ inter se nexæ , copulatæque virtutes . Fuit modesti animi , sibi que nihil arrogantis , Regno se haudquaquam parem profiteri ; fuit magni , atque excelsi , rem hominum opinionibus maximam , atque pulcherrimam , non magni facere ; fuit amoris in Rempublicam non vulgaris , Philippum , a quo quasi architecto publicæ felicitatis , multarum rerum salutarium fundamenta jacta esse videbat , nolle cessare , ac discedere ab operibus , quæ inchoarat ; fuit denique pietatis , atque observantiæ in Patrem singularis , multo illi subesse malle , quam tanto regno , tot illis longe lateque diffusis gentibus præesse , ac dominari .

O verè felix Hispaniæ conditio , o tempora priscis ætatibus multo meliora ! Fuit enim , fuit istud quondam nefarium in Hispania scelus , ut Patri filius pro adipiscendo Regno moliretur insidias . Nam cum Alphonso Hispaniæ Regi , cui Magni cognomen est , Garcias ejus filius , quem ad regnandum cupiditas effrænata ac furiosa rapiebat , periculum , & insidias pararet , cessit optimus Parens Imperio , & carere potius Regno , quam infestis Filii oculis in regno aspici maluit . Erat igitur hoc facinus pari , in Patrem observantia expiandum , debebat aliquis tantæ turpitudinis inultam Hispaniæ notam delere . Is vero fuit FERDINANDUS , qui a Patre privatam vitam , curisque vacuam repetere volente , ut iterum Imperium sumeret modestè reluctando , impetravit .

Cujus in Patrem observantiæ , quoniam hic mentio est injecta , alia etiam , quæ ad eam pertinent , indicabo , atque hoc dicam brevi , eam in FERDINANDO , cum magnam , tum vero etiam stabilem , ac perpetuam fuisse . Quanto ille Patrem officio puer , atque adolescens , tanto , corroborata jam ætate , ac sapientia , vir coluit , atque observavit . Testis est gravis ille dolor , ac diuturnus , quo ejus obitum est prosequutus ; testis mirifica illa cura , qua paternam voluntatem supremis expressam tabulis ratam esse voluit , diligenterque providit , earum rerum , quas mandarat , nequa negligeretur ; testis summa in spectatissimam Reginam Elisabetham ,

tham, & omnis officii plena observantia, eximius in fratres amor & liberalitas; egregia in paterni Imperii Ministros beneficentia, gratique animi, quotiescumque se occasio daret, significatio. Jam vero in illam, quam, Patre auctore atque hortatore, matrimonio sibi copularat (de qua hic silere, FERDINANDI amore in Suos commemorato, non est æquum) quo animo fuerit, quis nescit? quis non audivit? Ut vivam dilexit! ut luxit extinctam! ut amore, ac lacrimis sua non modo humanitas, sed conjugalis etiam fides, & castitas quanta esset apertè declaravit.

Jam hæc Oratio si quo alio in cœtu haberetur minus religioso minusque sapiente, esset fortasse aliquis, qui existimaret hæc, quæ dixi, non magnopere in Rege fuisse prædicanda, propterea quod hujusmodi virtutibus intra domesticos parietes conclusis, privatae potius, quam Regiæ laudes contineri videantur. Me verò consilii mei usque eo non pœnitet, ut pigeat non alia etiam commemorasse multo interiora, magisque privata. Quam assidua fuerit FERDINANDI Regis cum Deo consuetudo; quot piis precationibus, & coelestium rerum meditationi horæ attributæ, quanta diligentia coram Deo quotidie sinus & latebras conscientiae suæ omnes excuteret ac scrutaretur; quam sæpe ad eos, quos rerum ad animum pertinentium magistros ac moderatores delegerat, facta, dicta, cogitata omnia referret, orans atque obsecrans, ut se admonerent, si forte aliqua in re ab officio deflexisset. Privata ego hæc bona esse fateor, sed ita privata, ut posita in Regibus causa sint ac fundamentum publicæ felicitatis; vel quod natura sic est comparatum, ut ad bonorum Regum exemplum cæteri sese componant, eosque imitando, colant virtutem & honestatem, sine qua Civitates non miseræ esse non possunt; vel quod ipsi Reges animo a cupiditatibus soluto ac libero, acrius mentem intendunt ad publica commoda procuranda; vel quod in omnibus, quæ suscipiunt, ducem & adiutorem habent Deum, cujus nutu, ac providentia, Regna & Imperia, multo magis quam hominum consiliis gubernantur.

Et verò quidquam ne est rerum ad salutem Reipublicæ, ac populorum felicitatem pertinentium, quod non instituerit, magnaue ex parte etiam effecerit, hic, de quo loquimur, Rex optimus atque integerrimus? Parum ne magnam Hispaniarum Regnis
uti-

utilitatem attulisse videtur, qui primum, pace terra marique constituta, eundem Hispanis gravissimi, molestissimique belli finem, ac sibi Regni initium esse voluit; infinitis sumptibus modum fecit; multa Civium in alienis terris bellantium millia conservavit; Hispaniæ, suorum non modo cladibus, sed etiam ipsis jam prope victoriis ingemiscenti, dexteram porrexit, luctum ademit, otium, securitatem, commoda, quæ pacem comitantur, omnia repræsentavit? O Regem hominibus salutarem, ac natum publicæ felicitati, ex cuius Regni initiis pax continuo sit exorta, illa hominum, Urbium, agrorum, bonarum rerum omnium altrix & conservatrix! Quam FERDINANDUS semel arreptam arctissimè complexus est, ac tenuit usque ad extremum, neque, ut amitteret, ulla cujusquam auctoritate, aut precibus, aut pollicitationibus se adduci passus est. Nam ne invito adimi posset, ipse providit, qui & exercitus habuit maximos, & classes tantas, quantas haud scio, an quisquam antea, non belli gerendi, sed pacis tuendæ causa, instructas, & ornatas. Vidit enim hoc sapienter; inertes & imbecillos sæpenumero invitos bello implicari, eos contra longissimè abesse a bellandi necessitate, qui ad bellandum sint paratissimi.

Bene habet: Siqui sunt, qui bellica virtute atque armorum studiis delectantur, hæc ipsa vident regnante FERDINANDO in summa pacis, atque otii tranquillitate minime jacuisse. Quid studia illa multo meliora doctrinæ, ac litterarum, atque eruditi homines, qui ad ea colenda ingenium atque industriam suam contulerunt, pars cultissima atque humanissima Civitatum, nunquid jacebant, ac negligebantur? Imo verò vigeant, floreant, magno in honore habebantur. Quod FERDINANDUS homines litteratos non otiosos ac desidēs, sed Reipublicæ imprimis utiles judicabat; quod omni comitatis ac benevolentiae genere complectebatur; quod adjuvabat ad ea efficienda, quæ utiliter conabantur; quod eos, qui hoc in genere præclarum aliquid effecerant, præmiis amplissimis cumulabat.

Quid aliarum artium ad vitæ cultum usumque pertinentium, num est aliqua, quæ huic Regi non multum debeat, quam mihi verè prædicare non liceat, fuisse ab illo auctam & propagatam? Testantur illæ tot ad eas excolendas institutæ Academiæ, atque

una omnium celeberrima, huic nostræ Capitolinæ similis, a S. Ferdinando dicta, cui ab hoc bonarum artium patrono, annui, dignique Regia liberalitate redditus sunt attributi; testantur multi ex Gallia, Italia, Anglia, qui in aliquo artificii genere præstarent in Hispaniam evocati; testantur multi item ex Hispania alio missi, ut in iis, quas exercerent, artibus perficerentur. Quid illæ mercatorum tam multæ societates Toleti, Barcinone, Cæsaraugustæ, Hispali constitutæ, quid alvei excavati, ac fluminum deductiones ad commercii commoditatem, quid census ille tot Urbium, atque Regnorum, ut sciri posset, quantæ essent cujusque pecuniæ, ac possessiones ad Regni onera sustinenda, nonne magnam Hispaniæ utilitatem, majoremque FERDINANDO civilis prudentiæ, ac Regiæ providentiæ laudem attulerunt?

Jam miseros & calamitosos, partem illam Civium debilem, atque infirmam, sed tamen in primis Deo caram, & eorum, qui præ cæteris pollent opibus ac rerum copia, commiserationi a Christo commendatam, quo loco habuerit, utinam mihi liceret explicare oratione, rerum amplitudini potius, quam his temporis, mihi ad dicendum attributi angustiis accomodata. Multa proferrem exempla eximæ in hoc genus hominum largitatis, ac benevolentiæ. Commemorarem illum ipsum, quem dixi, totius Regni censum, rem tantæ molis, tot hominum opera indigentem, tam effusis ærarii Regii sumptibus effectam, hanc maximè ob causam, ut ii, quorum res familiaris accisa esset ac tenuis, nimis exactionibus ne urgerentur. Ponerem ante oculos ædificationem operum magnificentissimorum quo recipi, ubi ali possent; Nosocomia, Orphanotrophia, horrea pauperum usibus patefacta. Confirmarem nullam esse Urbem in tot Regnis, nullum oppidulum, pagum, vicum, in quo non extent multa vestigia hujus, quem dico, amoris erga calamitosos, nullum calamitatis, atque inopiæ genus, in quo arcendo, propulsandoque a suis, vel certè, quoad fieri potuerit, levando leniendoque Rex optimus, ac Pater potius amantissimus non elaborarit tanta cura, ut aliorum ærumnis non tam mederi velle, quam angi, atque affligi ipse videretur.

Hunc me campum laudis tam uberem ingredi, atque in eo paullum orationis frena laxare cupientem, cum temporis jam ad finem

finem properantis brevitās deterret, tum vero ad se invitat quodammodo, ac rapit Religio, sibi quē hanc extremam laudationis meę partem non relictam, sed reservatam poscit, ac flagitat, de cujus tuendę, proferendęque studio me intelligo apud supremum Religionis Antistitem, de Catholico Rege verba facientem, sine flagitio tacere non posse, pręsertim cum intelligam, omnis felicitatis fontem esse Deum, eosque Reges, gentium, quas regunt, bono maxime consulere, qui maxime studeant, Religione impense colenda, sibi, suoque Regno Deum conciliare. Quo quidem in genere video hunc Regem mirificum, ac singularem fuisse.

Deus immortalis? quę tanta fuit cujusquam cura in suis commodis procurandis, quanta FERDINANDI Regis, ut tibi omnis honor, cultusque ab omnibus suę ditionis populis haberetur, & tua ista Majestas tam sancta, tamque augusta, nulla unquam in re aliquopiam violaretur? Mihi sane de FERDINANDI Regno, rebusque gestis cogitanti sic videtur, cum nulli non Reipublicę parti diligentissime provideret, in hanc, quę Dei Optimi Maximi cultum respicit, sic tota mente, omnique studio incubuisse, quasi hoc unum, ac pręterea nihil curaret, ageret, cogitaret. Quantas ille pecunias contulit ad Templorum magnificentiam, cęremoniarum splendorem, Dei Ministrorum dignitatem non modo in suis, sed etiam in alienis ditionibus amplificandam? quantas ad Apostolicos homines magno numero mittendos in amplissimas Indorum regiones, quasi delectam militum manum, quę Christianam rem strenue gereret, nostręque Religionis fines propagaret? quanto animi ardore fidei quęsitoribus pręcipiebat; vigilarent, viderent, ne quid Religio detrimenti caperet, ne qua errorum pestis, in tanta, quanta nunc est, perditorum, & hominum, & librorum copia importaretur? quanta caritate divino cultui addictos homines complectebatur? quanto fastidio Christi hostes, atque illorum fautores a se repudiabat? ut Amburgensium, & Danorum commercio Hispanis interdixit, non aliam ob causam, quam quod cognoverat, initam ab illis esse cum Mauris societatem. Instabant tunc apud Regem multi, qui Reipublicę utilitatem a Religione sejungunt, nec utile, nec tutum Hispanis esse dicebant illorum populorum inimitias in se suscipere; urgebant aliorum Principum Legati, jam

jam favor , & gratia irreperat , cui nunquam non pater aditus in Regiam domum . Vicit tamen apud FERDINANDUM Dei causa , vicit pietas , vicit Religio , quam perpetuo adversus barbaros piratas , non magis publicæ tranquillitatis , quam Christiani nominis hostes , indicto bello Hispani tuentur , neque , nisi soluto cum Mauris fœdere , vel Amburgensibus commercium restitutum fuit , vel pax cum Danis redintegrata .

Jam vero in Romanum Pontificem , atque in istam , quam obtines , BEATISSIME PATER , Petri Sedem , quanto studio fuerit , quanta observantia , & pietate , silentio tacitus prætermittam , quod nolo eorum , qui adsunt , amplissimorum Patrum , ac Tuum præcipue , ad quem Ecclesiæ damna maxime pertinent , dolorem , ex optimi tibi que additissimi filii amissione , susceptum , multa dicendo facere graviolem . Nolo , inquam , apud Patrem de Filii , quem extinctum luget , pietate multa loqui , ac dare operam , ut acerbissimum altissimeque inflictum vulnus renovetur , ac recrudescat .

Quamobrem finem faciam aliquando , ac tantum , quod initio conatus sum , conabor etiam in extremo , traducere animos a luctus acerbitate ad earum rerum cogitationem , quæ affectis gravissimo justissimoque mœrore , solatio esse possint . Grave quidem est , grave profecto , & luctuosum , quod is Rex , quo nullus optari potuit innocentior , ac melior , nullus Reipublicæ studiosior , nullus bonarum artium cupidior , nullus Religionis amantior in ipso ætatis flore , in ipsa , quam constituerat , pacatissimi , tranquillissimique Regni felicitate , in ipsa rerum maximarum , ac multis mortalibus salutarium molitione sit extinctus ; quod Hispania Rege optimo , res Catholica defensore acerrimo sit orbata ; quod tibi , BEATISSIME PATER , ad Ecclesiæ clavum admoto non contigit , ut FERDINANDI virtute , ac pietate diu fruerere ; sed fuit necesse , eum Regem , cujus integritate , ac vigilantia rem Catholicam in Hispania florere intelligebas , quemque in ea , quam præstabat populi , felicitate , ipsum præter ceteros felicem , ac rebus omnibus florentem esse cupiebas , audire primum morbo gravissimo , ac molestissimo paullatim contabescentem , nec jam , ut solebat , suorum commoda procurantem , sed sua ipsius mala patientissime tolerantem ; deinde tantæ virtutis lucem ademptam hominibus , extin-

ctam-

Etamque dolere, nec egregiis FERDINANDI in Ecclesiam meritis ullam gratiam posse persolvere, præter mœrorem, & lacrymas, & hanc solemnem Sacrorum, ac funeris celebritatem. Hæc ego, ut sunt, gravia esse fateor, & acerba. Sed fient profecto leviora, magisque tolerabilia, si advocemus auxilio, primum si placet, rationem, quæ nos vetat in tanta rerum vicissitudine, & perturbatione positos, humanæ vitæ casibus cuicumodi sint, nimium commoveri, ac præscribit quæ necessario eveniunt, ferre omnia sapienter, ac moderate: Deinde, ut par est, fidem, magistram illam multo præstantiorem ratione. Ea enim nos admonebit, quod initio dicebam, ne bonis, ac fortibus viris, cum hinc abeunt, mali aliquid accidere arbitremur, sed cogitemus illorum mortem esse portum quemdam plenissimum tranquillitatis, cretionem pulcherrimæ, atque immortalis hæreditatis, adventum in possessionem bonorum, quibus collata Regum fortuna, mera inopia, & egestas dicenda sit, ut, si quam in ipsorum obitu ægritudinem animi suscipere velimus, multo sit æquius nostram nos vicem dolere, qui in his miseriis mansimus, quam illorum, qui ad tantam felicitatem pervenerunt. Accedat proptremo ad leniendum mœrorem, quo afficimur, hæc consolatio magna profecto, neque a me silentio prætereunda, ut cogitemus a Deo humanis rebus providente FERDINANDO CAROLUM Successorem datum esse; cujus virtus in Neapolitano Regno tanta cum Reipublicæ salute diu, multumque verificata quid effectura sit, cum in Hispaniam venerit, tantoque ampliore, in quo excurrat campum nacta erit, nemini dubium esse potest; ut quæ a FERDINANDO sanctissime, ac providentissime inchoata sunt opera, ea non abrupta ipsius mortē, sed fraternæ virtuti, ac sapientiæ reservata esse videantur. Dixi.

F I N I S.

SPECIAL

746.169.75

XXX

THE GETTY CENTER
LIBRARY

